

ChL 9117.148c

91

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

OCT 11 1932

~~80~~





惺心樓

歷仕錄

王氏家塾刻







書亦歸吳中質庫士禎于二千里外多方贖歸告  
諸家廟不啻寶玉大弓焉謹略述緣起于此俾吾  
子孫知祖宗手澤傳家之不易當世守之勿有隕  
墜否則祖宗之罪人爾矣可不懼歟

康熙四十一年壬午暢月

經筵講官刑部尚書不肖曾孫士禎百拜謹撰

歷仕錄

戶部左侍郎贈戶部尚書王之垣述

曾孫 經筵講官刑部尚書王士禎較

予初授湖廣荊州府推官到任後太守徐太室公  
送折禁役四名銀四十八兩為心紅紙劄油燭  
之費予辭之云減禁役名數萬一獄中有事責  
有所歸徐公曰昨條議開載已申本道何必辭  
予遂具文本道吳仰峰公以為然徐亦從之  
予初選出京時即聞荊州士夫多有請託者予意  
一人依一事則事事來囑一人囑允則人人來



屬金  
囑不如一切不從爲是時如江陵相公乃翁曹  
都憲年伯紀山公亦不徇從後遂絕無來者太  
守鄉官薛雲澤公自京回傳江陵語云理刑王  
公祖甚有執持我甚服之

予在荊州五年前後太守四人徐太室公孫台山  
公江心源公趙汝泉公皆相契汝泉趙公同事  
久尤以道義相厚常記趙公以公委往施州予  
署府印吏書有犯輒盡法繩處有謂堂上人役  
宜稍寬者予不以爲然趙公回深感謝焉趙公  
爲予理刑以至歸鄉前後垂三十年相厚無間

公子紉蘭爲山東憲副公祖仍來會二次每會  
坐至三鼓如一家骨肉然趙公諱賢官南吏部  
尚書河南汝寧府汝陽縣人

湖廣巡撫某公陞官離任取荊州杉板二十副計  
當費數百金太守趙公難之以問予予曰公政  
蹟甚著且屢有薦剡若送杉板是買薦本也且  
權詞應之必不可送後薦居首杉板竟不送

予以陳幼溪巡按委查盤岳州府太守姜省吾公  
同鄉名繼曾餽送禮物甚厚予辭之姜意不悅  
一月後隨按院出巡按院發下巴陵縣支銷底



簿查算內開姜太爺朝覲回收賀禮折緞銀八兩席禮折緞銀八兩予頗疑訝因面質姜公公大怒誓無此事予云知公必無所以面問今不必怒只拘該吏一問自明矣後審該吏乃署印通判某取送姜姜未收某私收不發姜遂釋然曰前公辭我禮疑公難爲人却是這樣好人時隨按院推官四人事完按院留姜茶問四推官行事如何姜荅云王推官老成他人不及

荆州府庫有王府故祿銀遼王差校尉取討未發時孫知府入覲王通判四川人署印王提庫吏

雷大夏刑責立斃其兄入韶具告撫按衙門批道府道府俱行理刑予提之三月不發犯人予欲叅長史不得已發下犯人陳廷璋等十四名送監聽問王怒出府往本道本道閉門遂至府前登鼓樓時太守趙公即差人來說有事同擔勿驚恐與予同至樓上見王王大怒云推官挫予威重予何以管束諸宗儀趙公委曲譬解王回府次日予往省查盤回至荆門州見巡撫同鄉谷近滄公公再三勸云王府事不可激予應以不可狗谷曰昔有七歲神童見一老僧僧云



汝進一步則死退一步則亡神童曰傍行一步  
亦有何妨今子正宜傍行時也予曰傍行如何  
谷曰且往查盤家眷且回家候王氣平仍具文  
來我再添一官會問二人便好擔當予曰諾連  
夜回署三鼓送家往祀縣姪象坤處次日即往  
永州府查盤越兩月始回府同岳州辛推官會  
問具招問軍一徒五餘俱不應罪名署道王憲  
副以交代日近不收招詳蓋畏之也後本道施  
恒齋公批允遼王甚怒施亦善應荅王怒無所  
施王素不道殘害宗儀荼毒百姓後竟發高牆

禁錮

予行取時十二月二十二日自荊州往省城起文  
赴京初意二十五六可到途中大雪行遲至二  
十七日申時抵江邊遇大風江中絕無行者予  
恐封印強舟人渡之至江心風浪猛巨漂蕩上  
下舟幾覆人盡恐抵岸若復生吏書楊應貞等  
二三人被驚臥病予亦悔之記乙未年同兄羅  
峰赴京乞恩行至平原縣境大風塵中遇一人  
帶兵器馳馬前行百步外立馬以待羅峰兄令  
家人張強先之羅峰在十步後予又在羅峰後



家人張進步行又在二十步後此人見強遂馳馬遠去予與兄甚懼至一村遂留宿不敢行記此二事爲行路之戒

予授刑科給事中時穆宗皇帝登極頒行赦條內開載未明晰四方奏本紛集內稱同一罪有赦有不赦者有既赦復收既收又赦者予具疏云大赦久頒疑獄未定乞賜申明條例以一法守奉旨部覆申明刊行

予以給事中充正使與禮部員外郎同年蹇理庵公冊封鄭府崇德王事完即日行所贖甚厚一

無所受理庵兄與予意同後理庵官至薊遼總

督兵部侍郎

士禎謹按蹇公視山東學時先祖方伯贈司徒公出其門

予任禮科都給事中科中檢出故南京禮部尚書霍韜所進聖功圖冊繕寫完進并條陳睿養事宜奉旨留覽

穆宗陳皇后出中宮中外人心不安予具疏請皇后正位中宮奉溫旨待后疾調理稍愈即還本宮禮部知道

郊祀慶成宴爲一代盛典久不行予具疏請奉旨明年行次年舉行曠典遂復



兵科給事中張順泉以鹽商事劾華亭相公坐贓  
謫戍後新鄭相公入相具疏援之旨下刑科都  
給事舒繼峰會同六科皆不直張叅寢拂新鄭  
意舒棄官回籍予時給假家居起補刑科新鄭  
授意同科梁淨齋問予順泉將具疏予何以待  
之予云照舒掌科會議六科看公論如何新鄭  
聞言曰不濟不濟張疏遂寢

同科筮給事中有心疾着紅袍入掖門內大哭復  
笑傳言內臣入奏予具疏檢舉筮某以心疾失  
儀乞恩寬宥奉御批筮東光著回籍閑住然予

初不知爲新鄭門人也後新鄭意甚不悅

予在刑科集聖祖基命錄進呈奉旨留覽

予陞太僕少卿未及三月即轉鴻臚正卿深以陞  
轉太速爲懼見諸老致不安意初不知爲劣轉  
也一年後會選郎同年呂日洲云此新鄭相公  
意也予意年兄資望不宜居此席相公云且曬  
他曬時正五六月每日一朝鴻臚在御座前身  
手不敢動移也時新鄭相公兼管吏部事似爲  
張順泉事也

萬曆初年親政甚銳一日一朝每日午時即有近



侍內臣來寺取次日臨朝揭帖起數予與同僚  
賈公名儒劉公儒張公朝聘薛公諫盡日在衙  
門三鼓即趨朝一年之內聞點朝官三次後改  
三日一朝

鴻臚寺起數揭帖各衙門無定規有開承旨者有  
開不承旨者錯亂非體予具疏會同禮部議定  
條件如承旨者奏事官致詞請旨玉音傳旨不  
請旨者致詞官奏知不傳旨仍要高聲達御座  
遂爲定例迄今行之

鴻臚寺大門內北有習儀亭舊例每遇朝覲十三  
省方面以下會齊俱赴習儀先向本寺堂官一  
揖然後率以行禮自異途掌印以來此禮久廢  
予遇朝覲年同僚賈虛庵輩言上次甲科某在  
衙門欲復此禮因兩司不肯入揖亦未舉行予  
曰非也習儀典禮何可以小嫌廢方伯二品臚  
卿四品欲其庭叅似難我今定儀注本寺未上  
堂先引入主簿廳坐本寺上堂主簿引入一揖  
由角門出在習儀亭門外東西分班立候此禮  
或可行也至期出一條例揭於後堂人皆樂從  
習儀之禮遂復



鴻臚堂官多異途序班又多援例監生以此屬官與堂官贄儀饋送爲常例甚不雅體統亦褻予待之甚嚴不許私宅謁見一時頗清肅考察年敗官者亦少

欽天監冬至日候氣原有密室久廢乃於一倉房行之甚褻予遷順天府尹具題動本府無礙銀修之前廳後室二廂房頗整潔請申相公作記文勒石于正廳之東

予尹順天同僚府丞朱公越崢名南雍舊時府丞除湖望外不上堂予到任每日請同上堂理事

吏部撥送吏承每人一名分用相得極權

順天府屬係畿輔重地一切差賦日增月派較外省各郡更數倍焉加以勢豪之侵占姦詭之影射小民困苦田土日就荒蕪人丁日漸消耗予具疏部覆審編量爲調停裁省冗濫頗於地方有益

黃梅縣舉人瞿九思生員周穀等因土地錢糧事毆傷知縣奉旨周穀發雲南充軍瞿九思口外爲民後九思上疏夤緣爲解脫計行撫按勘會予遷巡撫通省士夫兵書方金湖公以下皆屬



予爲之勘處且云莫悞渠會試予唯唯後江陵相公亦有書來予荅云前奉明旨嚴切今如何得解復其衣冠且會試假如一人落井出水安能即照常衣冠見客似難題復也蓋江陵公子方以九思爲伴讀耳後此事竟寢不行

德安景王府宮殿被火予初聞即訪知係廢宮內打柴人遺火後有南京一士夫造言在江陵相公處云是署印王同知張通判請客遺火連及侍郎何吉陽公公子監生字度及他鄉官一日予與本道傅君說事要從實方無後悔若累府

官及士夫異日事有變難說聞之南京及相公有書來云也傅唯唯後總司有一人迎合云

訪知果是請客遺火予曰有何的據方可具疏乃委李副使澄川帶四知縣入府查一無請客踪跡止有積柴并救火水筒而已該道仍隨總司執二府官巡按亦惑之致二官猖狂無狀予行武漢德安三府知府會問二總司覆問請客遺火無據惟每年年終府縣多人打柴但不知爲誰遺火止坐巡風官及看守人役具題奉旨歸結訖予後入京見相公相公亦不以拂意見



怒又見總憲陳皆所年伯云火災疏甚穩妥得大體

武昌府張同知偶責宗室一時諸宗儀紛集入府張同知迴避又來撫院門外把門人不容進予意宗儀難以直遂應之出白牌云各宗儀請回張同知擅責宗室聽叅處乃各散去事竟寢不行

湖廣撫院承差魏繼武予差用頗勤遂生事在岳州府經歷囑託不如意辱經歷經歷稟江防道張僉事喚至自稱都察院承差張怒責二十申

來予加責二十革役後二司云我必怪張然予深喜其革弊不知其當怪也仍致謝焉

嘉魚縣城中有一空衙門兵書方年伯公子欲以銀百兩易之修住宅縣申予駁之公子來見予又再三言此事決不可行縣官業已收銀入庫後金湖公書來云願以此銀入官贖公子妄舉之罪予謂銀何可入官但寢其事足矣

內閣相公殷棠翁編監懲錄爲有司勸廉靖懲貪酷予發漢陽府宋推官刊刻通行十五府湖廣有大奸何心隱即何夫山即何兩川即梁無



忌即梁綱一即梁光益的名梁汝元原籍江西永豐縣人以侵欺皇木銀兩犯罪拒捕殺傷吳善五等六命初擬絞罪後未減充貴州衛軍著伍脫逃各省及孝感縣倏往倏來假以聚徒講學爲名擾害地方中間不法情罪甚多各省歷年訪拏不獲俱有卷案萬曆七年新店把總朱心學於祁門縣捉獲予登按察司侯廉使查卷提干連人問理本犯在監患病身故該司將各省惡跡刊總冊仍出示以安餘黨俾改圖自新事後數年言官尚有爲稱冤具疏者蓋以假講

學之名遂爲所惑不知其有各省訪拏卷案也予具疏請行勘奉聖旨這有名兇犯原應正法不必行勘迄今公論始明云

予由巡撫轉戶部侍郎萬曆九年正月初二日與陳幼溪公交代先已行文三司各府不許差人遠送各王府長史司啓王不必送贐初三日過江行至應城縣時大雪冒雪行知縣李學詩留宿不聽中途不能前予宿舖舍轎內坐一夜家眷轎馬隨到各村止宿至次日方抵德安府風雪寒甚夫役皆不堪其苦予本意不欲遲留境



內恐冒嫌疑迄今悔之此亦小心之過何必乃爾

長沙府方伯董春江年伯予推官時曾謁之相待甚厚及撫楚公已作古人其長子婦亦士夫女也放債令家人比債打死一人投之河中事發罪坐家人抵命婦人雖未到官然家業蕩廢幾盡其夫廩生恐懼自縊予批詳後始知之甚憫念焉婦人無外事豈不信哉可以爲戒

予在戶部管太倉入倉查驗斛斗內一大斗異常問之云凡糧到倉該倉斗級每人先支一斗是

歷來舊規亦運糧人所願也予曰豈有此理即照常與大亦是私徇况另置一大斗可乎即諭各管倉主事出示禁革是年修總督倉場衙門估計約用百金有零管糧廳石郎中云此銀例該各倉斗級出辦予曰豈有此理宜其大斗要糧也隨與尚書張心老言部中發銀修之

萬曆初年驛遞勘合禁革甚嚴順天所屬歲省不下三千金王繼津公自兵部侍郎陞南部尚書回家例無勘合予問之云午門外餞席畢坐大車回予服其遵明例省便後予家眷回自覓夫



役家眷坐騾轎小車此自是好事非矯也  
予平日不囑託私事故入仕亦不徇人請託即相  
公皆不敢從如前所記瞿事火災事張順泉事  
可見萬曆十一年回鄉又書一帖于廳事云誓  
不說事迄今十四五年鄉人亦無求託者萬曆  
十八年鄉人平日不往來者約三百人具軸禮  
為太夫人慶壽予與作首羅君軫云某平日不  
管人家閑事何敢勞諸君羅云正以公不說事  
不害人大家陰受其賜所以來也今思既為士  
夫若自己身家及鄉親公道中有理事地方利

善事亦當白堂路但不百... 受及...

耳

予初中甲科時每年有白夫一名後增二名隆慶  
年間以本縣疲敝送回不用迄今不惟予不用  
各房弟姪及本縣士夫俱革不用又錢糧趙含  
章父母遵例優免稍從輕派錢仰庵父母一例  
派趙不致謝錢不求免聽之而已每年儘田地  
所出先備錢糧亦以事體當然平生既無裨益  
鄉人敢求益已而累鄉人乎

先公平蠻督木忠勤死事初聞訃音即痛孤魂萬



里何所憑依後得督撫川貴崑山李羅村公行文立祠越十餘年不知果否具書貴州撫院四川何來山公問之何行文發總司銀兩若干永寧衛指揮雷動等各捐金助工不數月工完仍差千戶丁春芳回報予因差承差丁朝舜致祭又以俸銀買祭田原門子李成看守承差回備言該衛致祭誠敬及鐫刻碑文詩詞予深感焉又念永寧尚建祠本縣鄉土豈宜無祠乃置地於東庄建立祠成又以木植單薄改建今祠於南郭外太夫人每到祠深以為慰予又自勸小

像侍立於左云

予為舉人時同羅峰兄到京為先府君忠勤死事乞恩時嚴世蕃用事賄賂公行說者謂求葬典非五百金不可得予云今盡賣產業亦不足五百之數倘不得則空費縱得之蕩家亦非先人所欲不如回家擇一好地修墳牆為穩兄以為然回家買畢易庵翁地修今塋兄司家榷予同諸弟晝夜閉戶讀書後各能成立諭葬今竟得之幸不辱先人也

附錄



予初入刑科時即請教掌科平定朱公后庵繪公云言官雖許風聞言事須自己真見切記不可聽人主使壞自己名節爲他人報私讐予心識之後果有具稿暗送欲予署名者然與予所見迥別急辭之月餘乃有同鄉一道長持此稿密問予予應以不可渠唯唯越數日竟上之識者駭異後果以此敗官

前輩先進涉歷事久多有高見有疑難不能自決不可不一咨問予曾有二事一請教兵部侍郎吳公自湖一請教兵部尚書張公心齋二公論

之甚透切予深服之即從所言

紀友

予生平得朋友之益居多同窓于公華峰等同僚

南吏部尚書趙公汝泉等同年兵部侍郎劉公

節齋

繼文

等劉公在科甚相得予給假回起行前

十日每夜必携酒相過別後得女約結親官兩廣總督寄書禮候二次聞予得壽山寄詩冊爲賀予病則書來若疾痛在其身寄桑寄生丸二次每自思未能酬報然耿耿于懷倘子孫有相遇者勿忘報德兵部尚書邯鄲張公弘軒

國象



乾中進士時約同年同科三十餘人舉賀及總督薊遼書來林下二次記之報之

師

魏雲汀先生諱智知縣

同學

于華峰名三善教授

畢吉齋名祺廩生

畢健齋名昌廩生

成及泉名績舉人

同僚

府

趙公汝泉名賢汝陽人吏部尚書

徐公少室名學謨嘉定人禮部尚書

孫公台山名用福建人知府

江公心源名一麟婺源人副都御史

科給事中

何公來山名起鳴四川人工部尚書

梁公靜齋名問孟河南人副都御史

張公湖東名鹵儀封人副都御史

丁公觀峰名懋儒東昌人知府



朱公後山名

繪平定州人少卿

温公一齋名

純涇陽人吏部尚書

鴻臚寺

賈公虛庵名名儒雞澤人左少卿

南太僕寺

劉公仁軒名衡陽人少卿

許公敬庵名孚遠浙江人兵部侍郎

順天府

朱公越嶒名南雍山陰人太僕寺卿

戶部

張公心齋名學顏肥鄉人兵部尚書

劉公紫山名思問孟縣人戶部尚書

楊公夢山名魏海豐人吏部尚書

王公雲澤名廷瞻黃岡人戶部尚書

王公後齋名友賢寧鄉人尚書

右記數公餘不盡書

紀夢

予嘉靖戊午春月夢儒學前出一魚一人得首一人得尾予得中半及開榜詩經首趙維魚予居中下則李魚化



紀異

予巡撫時有銅錘二以不可貽後人命工銷之爐  
火鍊底鐵入銅融化為一稜稜如也命工人疏  
剔乃成山形高三寸許旋視之有壽星王母列  
仙像種種異態時值太夫人誕辰見者竒之邑  
令太倉銘盤張公新繪圖為記

歷仕錄終

歷仕錄跋

歷仕錄一卷 先曾大父司徒公自記生平跋  
歷中外居官之概平實坦易無鋪張揚厲矜名  
銜才之語而于平生師友間尤三致意焉其忠  
厚剴切之意藹然形於楮墨之外此子若孫世  
世當法守者也其中大奸何心隱一事蓋顏山  
農何心隱皆假道學之名恣為姦利而士大夫  
多為其所惑萬曆中御史趙崇善者疏言其寃  
且言心隱以譏江陵相奪情江陵憾之授意於  
公為之報復云錄中所載數年後尚有為之



歷仁金  
稱寃具疏者蓋指崇善也

又跋

何心隱在萬曆間屢變姓名詭迹江湖間所脅金帛不可訾算嘗遊吳興誘其豪為不軌又與一富室子善偕之數百里外忽曰天下惟汝能殺我我且先殺汝繼之湖中取其家數百金然後縱之其黨呂光者力敵百夫相與為死友又入蠻峒煽惑以兵法教其酋長事聞于朝先曾祖時為湖廣巡撫捕之獲於嶺北罪狀昭然迨江陵敗後御史趙崇善者挾私憾追劾先公殺

心隱以媚江陵時先曾祖久以戶部侍郎養

家居矣雖事之本末自有公議而崇善捷捷幡

幡良可畏也此事之詳具載大宗伯周寅所先

生應賓識小編王弇州先生別集其所載顏山農

挾詐趙文肅千金與姦良家婦為心隱所毆事

尤污齒頰山農即心隱講學師也道學狼籍至

此可為浩嘆崇善此疏刻入萬曆疏鈔士大夫

或未詳何顏顛末者恐輒信之聊復述及以質

公論云士禎再記



公儲云士通再出	如本初何能復有	此何無部	夫西齋	外有	主	謝	來	公
---------	---------	------	-----	----	---	---	---	---



